

103

LUCAS EPIC.

Pd



Dbl. Ton Vg 1654

überh. **P. e. 32**

3

10 hr

000

Lit. Thw. ^K M vt. 197.

~~196~~ Doublette
nicht gestellt

In me moneam Anno
quodit hinc hōm
Bartol. Jan. Wilm.
amico intimo atq
parchano Dno.
Lemino W.



Anderer Warhafftige
Neue Zeitung / von
dem grossen Sieg der Christen / auff dem
Ionischen oder Ausonischen Meer / wider den Tür-
cken / so bey dem Porto Le Pante (sonsten
Naupactus genandt) aus sonderba-
rer schickung Gottes erhalten
worden / den 7. Octo-
bris / Im Jar
1571.



Sampt gewisser Verzeichnis / was auff
beiden seiten / von furtrefflichen Leuten
gewesen / vnd zum theil ge-
fangen vnd blie-
ben sein.



Leipzig.

Gedruckt / durch Jacob Ber-
walds Erben.



Handwritten text, likely bleed-through from the reverse side of the page. The text is mirrored and includes a date: 1571.

Handwritten text, likely bleed-through from the reverse side of the page. The text is mirrored and includes a date: 1571.



Handwritten text, likely bleed-through from the reverse side of the page.

Handwritten text, likely bleed-through from the reverse side of the page.



Zeitungen.



Nach dem der Türck im verschie-
nen Jar / vnversehens / der Herrschafft
zu Benedig / Wider trawen vnd glauben
die Insel Cipern vberfallen / vnd in dersel-
ben Insel die Hauptstad Nicosiam mit
gewalt erobert vnd eingenommen / Vnd viel tausent Seelen
darinnen erbermlichen / vnbarmerzig / von Jung vnd Alten /
Mans vnd Weibspersonen vmbbringen lassen / Volgends /
für die Befestigung Famagusta sich gelegert / vnd zu etlich
maln durch Sturm vnd in ander wege versucht hat / dieselben
befestigung einzubekommen / welche ein lange zeit des grossen
gewalts sich erwehret / vnd vielleicht bis daher thun hette köns-
nen / wenn sie ersetzt vnd Prouiandiert werden können. Aber
der gedachte Türck vormercket / das der gemelten befestigung
mit gewalt nichts abzubrechen were / hat er ein gewaltige Ar-
madam zu Wasser ausgerüstet / dieselben seinē vornehmste Kries-
ges Rheten vntergeben / welcher Namen hernacher verzeich-
net werden sollen / Die in der Benediger Colsum abfaren /
vnd alle derselben Portus einnemen solten. Darzu denn ein
zimlicher anfang gemacht / das dieselben allbereit etliche Ort /
Als Dulcigno / Antiuari / vnd Buduam eingenommen / Ca-
taro belagert vnd zu nechst an Benedig gestraiffet / vnd sehr
viel Volck's hinweg gefürt gehabt / Vngewisselt darumben /
auff das die inn Famagusta nicht möchten entsetzt werden /
vnd entlichen aus hungers not sich ergeben müsten. Vnd
wenn er deren Ort die Oberhand gewinnen würde / das er
auch zu Land nicht allein die gedachte ehrliche Herrschafft zu
Benedig / sondern auch andere Christliche Potentaten bekries-
gen kündte.

Ein solches aber abzuwenden/ haben etliche hohe Potentaten mit den Benedigern sich einer gegenwehr verglichen/ Die ist aller ersten den 16. Septembris zu Messina in Sicilia zusammen kommen / Von dannen den 26. Septembris auff Corfu geruckt.

Daselbsten haben den 28. Septembris/ die von der Christen Armada/ Rath gehalten/ was sie thun solten / ob sie dem Feind nachjagen solten oder nicht / vnd hat der mehrer theil (aus folgenden vernünfftigen vnd guten vrsachen) für gut angesehen vnd dahin geschlossen. Man solte ihme nicht nachjagen. Denn es wehre spat im Jar / möchten leichtlich vom Ungewitter verschlagen werden / vnd hette der Türck einen grossen vorthail in der nehe/ als dem Hafen / Le Pante alias Naupactu. In dem wurde jm nichts abzubrechen sein / Vnd was hieuor die Christen vor Zerbe, Algiera, vnd andern mehr Orten/ zu vngelegener zeit für vnwiderbringlichen schaden erlitten/ auch mercklich viel der gansen Christenheit an dieser Armada gelegen were/ angezeigt. Vnd dafür vnd an des Stadt/andere ort vnd Flecken für geschlagen/ Als Margariten, Soppoten, oder das New Castell/ die zugleich / oder ein jedes besonder zubelagern. Darwider hat der Herr Augustin Barbarigo, ein fürtrefflicher / beredter vnd beherzter Man/ von der Benediger wegen fürbracht / das mit besonderer mühe vnd arbeit der Christen Armada zusammen geführt/ vnd die/ Gott lob/ wol auff vnd nach notturfft versehen were. Da hergegen die Feind den gansen Sommer vber / auff dem Wasser gewesen vnd ausgemattet / Vnd hoffte die ganze Christenheit/ sie solte vnd würde viel ihrer mit Christen von diesem Tyrannen erledigen. Wenn sie solches auch nicht thete/ so were es ihr ein ewige schande. Vnd da es jetzt nicht geschehe/ so möchten als bald sich keine gelegenheit mehr darzu zutragen/ Vnd würden die Türcken noch diesen Winter ihre krefften erholen/ sich stercken/ vnd noch viel schadens den Christen zufügen. Vber dis were zubefahren / Da der Christen Armada/ mehr den ein Ort belagern vnd sich trennen würde/
das

das sie viel gefahr müsten ausstehen / Denn den Türcken were mit wenig Volck nichts abzubrechen. Solte auch die ganz Christen Armada vmb der obgemelten Flecken einen sich annehmen / so trüge es den kosten nicht aus / man besetzte auch die wie man wolte / so köndten die Türcken dieselben leichtlich wider einkriegen. Hergegen da die Türcken geschlagen / so wurden die gemelten Flecken sich selbst ergeben müssen / vnd dürfften geringer besatzung. Hierauff den Herrn Ioan. de Austria, vnd alle anderer Nation Oberste / vermanet / Das sie ihr ehr bedencken / ein gut gerücht vnd Lob inen machen / Mans herzen annemen / vnd kein schewen oder entsetzen haben wolten / für die ganze Christenheit / von wegen des Christlichen Glaubens / vnd vmb beständigen frieden zuerlangen / Ritterlichen zustreiten / mit andern mehr Worten. Bey diesem ist es diesen Tag vnuerrichter sachen blieben.

Den folgenden als den 29. Septembris / hat man etliche Mawerprecher vnd grob Geschüß eingeladen / vnd abermalen Rath gehalten / vnd sein der mehrer theil / aus obgehörten vrsachen / noch irer vorigen meinung gewesen. Aber der Herr Augustin Barbarigo seinen vorgethanen fürtrag widerholet / Embsig angehalten vnd gebeten / man wolte doch nur ein versuchung thun / Wenn sie nicht guten Wind hetten / so wolten sie wider nach Candiam schiffen / vnd von dannen denen in Famagusta hülff zu schicken. Vnd da es vielleicht etlichen vmb die Prouiant zuthun / so were hieran kein mangel / sondern hetten sie dern vollauff zu Corfu. Insonderheit eine große Menge von Biscoten, dauon wolten vnd solten die Venezischen inen mit theilen / so viel sie dern begerten. Auff diese abermal tröstliche vermanung / solle der Herr von Austria sich erkleret vnd erboten haben alles das zuthun / das die Benediger an ihme begeren würden. Vnd ist nach gehaltenem Rath jederman in die Galeen getreten / vnd die ganz Armada mit gutem wind abgefahren / vnd kommen in den Portum genandt Legomenicus, Alda zween tage von wegen des Windts / welcher jr entgegen gewesen / still ligē müssen / vñ hat gedachter Herr

Cretam abas



Barbarigo nirgend der hinderst sein wollen/Darüber auch wie
hernach angezeigt werden sol/er blieben. Der Allmechtig Gott
verleihe der Seelen vnd allen Christgleubigen eine fröliche
Aufferstehung / Amen.

Derselben zeit/ist die Türckisch Armada zu Preuesa gewe-
sen/vngesehrlichen 60. Meil von Corfu gelegen. Vnd als sie
vermerckt/das die Christen irer begert/ist sie geruckt in den Col-
fum oder Hafen mit namen Le Pante. In welchem Hafen
sie wol sicher sein können. Vnd hetten die Christen nimmer-
mehr gemeinet/das dieselben daraus sich begeben solten / so im
einfahren eng/ vnd auff beyden einer jeden seiten / ein zimlich
Schloß gehabt/ Dardanelli genandt/vnd inwendig sechs meil
lang/vnd vier meil breid gewesen / Darumben auch die Chri-
sten einen ganzen tag sich auffgehalten/vnd nicht gewußt wenn
die Türcken inn diesem Porto bleiben würden / was sie thun
möchten/Vnd hat der Herr Ioan. de Austria auff die Schiff
warten/vnd die 6. Mawerprecher vnd in 30000. Man ausla-
den vnd setzen wollen/ vnd vmb die Schlöffer vor dem Colfo
sich annemen/welches den Christen / wenn es geschehen / nicht
zum besten geraten were.

Die Christen aber/sein den 6. Octobris weiter geruckt in
den kleinen Canal von Cephalenia, wie auch das die Türcken
vernommen/ Hat der Caracoggia Corlar sich angeboten / er
wolt mit einem Rennschifflein kundschafft einnehmen/vnd ohne
gefahr vnd muhe abzelen/ wie starck der Christen Armada we-
re / welches er thun / aber nicht wie die not erfordert gehabt.
Denn er die gewissen zal aller Galeen vnd Schiff nicht erfah-
ren / Denn ober funffzig noch in dem gedachtem Canal blieben/
die nicht mögen gesehen werden / Vnd nach dem er zu dem
Pertaw auch Alabassa General Vbristen der Türckischen
Armada kommen / sol er denselben viel von einer geringern
anzal/denn der Christen Armada / starck gewesen/bericht thon
haben/welche zuvor gespaltener meinung gewesen / darunter
der General Bassa begert zu schlagen/andere aber /nach lang
erzelten vrsachen dasselbe widerrachten vnd jedoch von gemel-
ter

ter ansag beherzt worden / so ohne das von dem Türckischen
Keyser / irem Herrn befehlich gehabt / zuschlagen / mit grossen freun-
den zu dem treffen sich gefast gemacht vnd geschickt.

Auff solches ist die Türckisch Armada am gemelten sechs-
sten tag Octobris nechst vorschienen / da auch der Windt der-
selben zeit für sie gewesen / aus dem gemelten Colfo Le pante
gefahren vnd nach dem nicht lang darvor vber die ordentliche
besatzung vber 12000. Spachen guten vnd frischen Kriegs-
uolck die gedachten Türcken eingesetzt / mit dieser gelegenheit
vnd macht verhofft gehabt / die Christen in dem gedachten Ca-
nal Cephalenia zu vmbgeben vnd zubelagern vnd dern end-
lich mechtig zusein. Aber der Allmechtige G. D. hat es gene-
diglich vorhütet. Denn wider alle vernunft vnd der versten-
digen Kriegs erfahnen bedenecken / Als das es bey der nacht /
vnd der Feind in der nehe / auch der Wind entgegen gewesen ist /
hat der Herr Ioan. de Austria, auff anhalten vnd bitt des
Herrn Proueditors Augustin Barbarigo, auch wider aller
andern Befelchsleut willen / einen der Angulus Gioanni ge-
nandt / zu sich erfordert / vnd den 7. tag Octobris / vngefahrlich
zwo stunden auff den tag Auffzubrechen befohlen. Sechs gros-
ser Galeen bey der Handt behalten / vnd etlich gemeine leichte
Galeen vorhin geschickt / auff vngeuerlich ein grosse Deutsche
Meil / Kundtschafft einzunemen.

Wie nun die kommen bey nahend Cursolari, einer Insel
sonsten Ithaca genandt / zwischen Patrasso vnd Cephalenia,
haben sie die Feind entgegen gesehen / so mit allen freunden auff
der Christen Galeen mit vollen Segeln vnd fehlen vnd star-
cken Riemen geeilet.

Also das pinnötig den abgesandten zeit vberlassen wor-
den / Solches der Christen Armada anzuzeigen.

Wie nun das der gedachte Ioan. de Austria, vernom-
men hat / Ist er / so ein weisse Rüstung angehabt / in ein
Freganti-

Fregantinen gestigen / vnd fast alle Galeen umbfahren. Vnd auch wider die Feinde die Schlacht angeordnet / mit ernstlicher vnd trewer vermanung / beherzt mit dem gemeinen Feinden des Christlichen Glaubens / vmb Christi ehr willen zuschlagen / vnd vermeldet / das er jr Obrister nicht / sondern ihnen gleich / Aber Christus were der Herr / ihr Patron vnd Oberster / ein Herr vber die ganken Armadant / Inn den setzt er alle seine Hoffnung / guter zuuersicht / er würde mit seinem Arm so viel genad beweisen / Das sie den gedachten Feinden möchten ob siegen. Hierauff ein jeder geschrien / mit einander vber Laut / sie wolten denselben vertrauen / vnd jr bestes ankeren / welches nicht ein geringe anzeigung frölichen tags des Siegs / geben hat. Es sein auch als bald alle Galeoten in der Christen Galeen vnd Schiffen ledig gemacht worden.

Vnd wie nu die Türcken / in formb eines halben Monscheins / ihre ordnung gemacht / Jedoch von dreyen vnterschiedlichen Gliedern. In dem dritten Glied gewesen der Oseiali Corlar, König zu Algier / Welcher verordnet ward / wo von nöten / den vberlegenen zu hülff zukommen / Dern in allem 200. Galeen vnd 90. Fusten vnd etliche Schiff gewesen sein sollen. Da haben hergegen die Christen zu dem treffen die ob gemelten Sechs grossen Galeen / mit der Capitana aus Sicilia verordnet / Auff die gefolgt der Herr Ioan. Andreas Doria auff der Rechten / der Herr Veniero, vnd Barbarigo von wegen Venedig / auff der Lincken seiten / vnd der Herr Ioan. De Austria in der mitten / ein jeder mit 53. Galeen / auff dern jede vier andere Galeen gefolget.

Vnd in der vierdten Ordnung gewesen / Abermaln auff einer jeden seiten / vnd in der mitten 15. Fregaten vnd Bregantinen. Auff diese gefahren der Herr Alvaro von Bazzan mit 37. Galeen / Vnd im nachzug abermaln gewesen 10. Fregaten vnd Bregantinen. Vnd auff beyden einer jeden seiten der ganken Armaden 10. grosser wolgerüster Schiff / vnd an stat angehengter flügel / zwei grosser Galeen.

Vnd wie der Scherz ist angangen / vnd beyde theil Turzolari

zolari oder Ithica sich zusammen genahet/haben die Türcken/
irem brauch nach / hefftig vnnnd vberlaut anfahen zu schreyen/
vnd jr grob Geschütz zeitlich / auff die Christen abgehen lassen.
Die Christen aber seien inen gemach entgegen kommen / vnd
hat der widerwertig Wind (welches wol für ein wunder vnd
gnade Gottes zurhümen ist) sich gelegt / vnd die Christen die
sechs grosse Galeen / dieweil es also Windstill worden / vor-
herfahren vnnnd anziehen lassen / auff welche der Alibassa, vnnnd
in mitten derselben getrungen / Die Christen aber den Feinden
mit dem geschütz / nicht weniger schaden gethan / Dann ihnen
forcht gemacht / also das dieselben anfahen zuschreyen Ma-
home Mahome, vnd sich verwundert / das dergleichen geschütz
vnd gewalt / vnter der Christen Armada sein sollen / Vnd als
der Christen geschütz gar wol getroffen / auch andere dem vor-
zug der sechs Christlichen Galeen zuhilff kommen / haben sie
den gedachten Alibassa, wider in die mitten gefast / dermassen /
das die seinen jr Geschütz / nicht sonders mehr gebrauchen / noch
den Christen damit schaden zufügen können / Es haben auch die
andern Türcken / ire Ordnung des halben Mons / trennen vnd
teilen müssen / Vnd ist der erste angriff geschehen von der Feind
lincken / auff der Christen rechten seiten / welcher angriff auch
der gröste gewest ist / Der ander von dem Haubtfahnen / Vnd
der dritte / von der rechten seiten / Vnd ist im ersten antreffen
fast alles Volck / so in 10. Galeen gewest / erlegt worden / mit
des Herrn Ioan. Andre Doria grosser gefahr / das man sich
auch desselben verwegen gehabt / vnd hette er Herr Doria mit
dem zuuiel hinaus lassen / vbel gehandelt / da ime andere Galeen
nicht zu hilff kommen weren / von welchen er errettet / also das er
den Feinden entlich mechtig sein können.

Auff der Christen rechten seiten / hat man auch viel ausste-
hen müssen / Wiewol sich die Christen Ritterlich vnd wol ge-
halten / Sie hetten auch nicht ausdawn können / wenn nicht der
Marches S. Croce mit den Galeen im nachzug / inen zu hilff
kommen were / welche die Feinde mit grossern ernst angegriffen /
Dabey aber auch der vorthail gewesen. Das der Wind sich auff
der

W

der

der Christen seyen gewendet / vnd allen rauch von dem Geschütz / auff den Feindt getrieben vnd geschlagen / das sie darvon mit sehen können / daran aber die Christen keine mangel gehabt.

Der Herr Ioan. de Austria hat mit seiner Galea / auff des Pertaw Bassa Galea getroffen.

Des Herrn Marci Antoni Colona Galea / hat vnter augen / vnd dan auff der seiten zwo Türckische Galleen gehabt / vnd ist deshalben nit in geringer gefahr vñ nöten gewest / jedoch mit einer kleinen entsagung / sich der Feinden gewalt erwehret.

Vnd ist der Herr Veniero, der Venediger General / auch in einer planckē rüstung bey dem grossen geschütz vorn auff seiner Galleen gestanden / welchs von einem also Allen Herrn seltsam zuhören / vnd mit des Ali Bassa Galeen Ritterlich gestritten.

Der Herr Barbarigo, Welcher nun zu Himel ist / hat sich auch der massen gehalten / Das sein lob nicht auszusprechen / der ist aber mit einem Flitschpfeil in ein Aug geschossen vñ dermassen verletz worden / Das er hernach / in der 15. stund / aus diesem / in ein besser leben von Gott abgefördert worden.

Alle massen haben sich auch alle andere von Italianern vnd andern Nationen / Ritterlich vnd wol gehalten / welche darumben ewigen lobs werd sein / nach dem sie etliche stundt in lebens gefahr bis an den hals gestanden / also das sich ein gute zeitlang kein theil obsiegens berhümen dörfen / dauon in specie vil zuschreiben were / vnd wirdet von einem vermeldet / Welcher mit vnd dabey gewesen / Es habe fast ein jeder Oberster vñnd Befelchs man / zwen schüs aus Koren / welche doch nicht alle durchgangen / auch etliche flitschen zeichen dauon gebracht.

Aber in werendem streit vnd rauch soll der Oschial Corsar, mit vngeferlich 30. Galleen vnd Füssen / ausgerissen sein vnd nicht mögen gesehen werden / wohin er gestoben oder kommen / Volgents aber in der nachteil / Sollen die Christen / von den gedachten seinen Schiffen / Zwölff Galleen angehalten vñnd erlanget haben / vñnd er für sein Person / mit vngeferlich 6. Türcken, vñ dem geld, so er bey sich gehabt auff einer Fregaten /

zu Landt entworden sein / welches doch noch ungewis/sondern
gewissere zeitung davon erwart wirdet.

Vnd nach dem gemelten Kampff vnd Schlacht/ vber fünff
stund lang geweret / hat entlich der Allmechtig Gott/dē Christe
gen Sieg verliehen / die haben von den Feinden die Obristen
befelchshaber / vnd bis in die 50000. oder 60000. Türcken umb-
debracht vnd nider gehawen/ auch in 10000. Türcken gefangen
vnd in 161. Galeen welche noch zu gebrauchen/ vnd 12. Galeoten
von 22. Pencken/erobert / Vnd nach Corfu vnd Candiam
geschickt.

Sonst sol ein zimliche anzal von Türckischen Galeen / zu
grunde geschossen vnd verprendt vnd in 15000. gefangener
Christen erlediget worden sein. Darzu sich die Galeoten auff
den Türckischen Galeen (welche zuvor Christen gewesen)
ungeachtet das sie an Ketten angeschlossen / sich nichts weni-
gers zu der Christen vorthail / auch wol gehalten / den Türck-
en bis auff die Been/schaden zugesügt/vnd den jenigen/Welche
sich in ernst zu weit hinaus begeben/vollends vber Port geholf-
fen/vnd wie die hundtomb sich gebissen haben sollen.

Vnd ob wol die Christen Gott lob den Sieg vnd Vi Ro-
riam erhalten / So sollen doch auff irer seiten / auch vil Kriegs-
volck / vngeserlich in die 14000. Man umbkommen sein/darun-
ter ein guter theil dem Herrn Barbarigo vntergeben / Vnd
allein in 20. Adelspersonen von Venedig / aufferhalb deren/
die verwundt sein. Mer 6. Galeen zu grunde gangen/Darun-
ter ein Maltesische/Zwo Venedische / ein Florentinische vnd
ein Candiottische / vnd wirdet zuorderst der Herr Barbarigo
sehr geklagt / es sol auch in einer Maltesischen Galeen/Von
wegen irer ertlichen gethanen gegenwehr/mit ein einiger Ritter
vberblieben sein.

Der gedachte Herr Veniero der Venediger Oberster / ist
auch verwundt/aber nicht gefehrlich/dergleichen Herr Paulus
Vrsinus durch einen arm geschossen / vnd vom fchwercck an
der einen huffe verlest/ auch andere vil Haupt vnd Befelchs-
leut verwundt worden.

Die grossen Galeen der Christen/ habẽ mit irem Geschütz/
den Türcken grossen schaden zugefügt / Von den subtilen Ga-
leen / hat man sich mit der faust wehren / Ketten anwerffen / vnd
allen ernst vnd fleis brauchen müssen / dieweil auff denselben
Galeen/ das Geschütz wenig nutz gewesen.

Die erledigten Christen Galeoten / von der Türcken Ar-
mada vnd Galeen / seien alle wol begabt worden / vnd die sag
gewesen / man wurde den andern erledigten Christen / die von
den Feinden eroberte Galeen/ vntergeben. Jedoch auff sondere
mass / damit sie sich ihres schadens ein theils zuerholen hetten/
vnd nemlich/ was sie erobern vnd gewinnen würden/ ausserhalb
des Geschütz vnd liegenden Güter / das solte jr sein / vnd solte
inen zur verlag ein fürlehen geschehen.

In des Pertaw Bassa Türckischen Oberster Gallea / sol-
ten in 22000. Sultanini, In Gold / vnd in des Caracoggia
Gallea in 40000. Zechini, vnd sonst in den Schiffen vnd
andern Galeen/ grosses gut gefunden worden sein.

Der Herr Ioann. de Austria, Sol den Türckischen Ge-
neral Bassa, / als er gefangen vnd hart verwundet / den kopff
abgeschlagen / vnd denselben fürder in seiner Gallea / auff ein
lange stangen oder spies stecken lassen. Vnd den Herren Ve-
niero angeredt haben/ den er von wegen seines hohen Alters/ ei-
nen Vater genent/ Er hette der Venediger verstand vnd macht
erlernet/ vnd erfahren/ vnd wie bisher beschehen. Also wolt er fort
hin/ sein vermögen bey inen zusehen / vnd darauff den fürschlag
gethan / Dem erlangten Sieg nachzusehen / ob sie den Oschi-
ali auch zur hand bringen möchten/ Welcher entweder in Bar-
bariam oder in Lepantum, in Sinum Corinthiacum geflo-
hen sein müste.

Diese obgeschriebene Zeitung/ Von dem erlangten Sieg/
hat anfenglichs die Gallea Iustiniana, gen Venedig gebracht/
Diese hat allenthalben Türckische Fahnen auffgesteckt / vnd
auch vngewerlich bis in 40. gefangene Türcken/ mit sich geführt/
Als aber die noch in der weiten gewesen / vnd etliche Freuden-
schüs gethan. Ist darob jederman zu Venedig erschrocken/
Weil

Weil man nicht gewußt/ Warumb vnd von wem es geschehen/
besorgend/ die Feinde weren in der nhe. Darumb seyen alle
Bürger vnd Kriegsleut / auff die verordnete Plätz gelauffen/
vñ hat die herrschafft zu Venedig/ je ein Keßschiff nach dem an-
dern hinaus gesandt / alle gelegenheit zuerfaren vnd einzuneh-
men / Wie nun die obgenandten sich zu der obgedachten Gal-
leen genahet/ vnd befunden/ das es Freunde/ auch gleichwol alle
Galleoten / mit köstlichen Türckischen Kleidern bekleidt gewe-
sen/ Welche geschrien Victoria, Victoria, Habē als bald die
ersten/ die solches gehört/ ohne weiters nachfragen/ umbgewen-
det/ vnd seyen die letzten/ im zurückfaren/ die ersten worden / vnd
je einer dem andern wollen vorkommen / Diese gute Zeitungen
heimzubringen / vnd auff das keiner mehr vortheils / denn der
ander hette / haben die hindersten / Welche im ausfaren die for-
dersten gewesen/ als balden sie zu der Stadt kommen / auch an-
fahen zu schreyen Victoria, Victoria, Von diesem geschrey/
ist jederman von den Plätzen geloffen/ eins theils in die Kirchē/
eins teils zu dem Pallast/ vñ nach dem die Justinianische Gallea
selbst ankomen/ welche die Türckische Fahne/ im grossen Canal
nachgeschleift/ vñnd gemelte Zeitungen bestetigt / ist der Herz-
og vnd die Herrschafft auch in die Kirchen gangen / vnd hat
man alda das Te Deum Laudamus gesungen/ vnd alle Glo-
cken in Venedig geleutet/ auch Jung vnd Alt für fremden ge-
weinet.

Hernach soll auch den 27. Octobris des Herrn Ioan Bap-
tista Contarni, Gallea/ Zeitung gebracht haben. Das die Chri-
sten/ die Stett Lepantum vñ Patrasso in Peloponeso gelegē/
eingenomen vnd geschleift hetten. Legen vor S. Maura, vnd die
sagt/ Oschiali wehre dahin geflohe/ hieruber aber/ vnd ob solchs
veruolgen werd oder nit / ist man ferner berichts gewertig.

Vnd hat die Herrschafft zu Venedig / an der abgegang-
nen Ahet/ vnd beselchs herrn stat/ andere erwählt vnd geordnet/
die werden mit dem Herrn Iacobo Soranzo, jetzigem Proue-
ditor, an stat des Herrn Barbarigo, abfaren / Vñnd hat der
Herzog zu Venedig / In vollem Ahat/ meniglich / zu Erbarn
B iij wandel

wandel vnd leben / vnd die Jungē Herrn / das sie sich gebräuch
en lassen / vnd etwas versuchen wolten / vermanet / vnd das man
den Sieg / für Gottes gnade vnd gaben halten / vnd keiner
Menschliche hilff vnd macht zurechnē solt / mit viel schönen aus
führungen / etc.

Vber die obgemelten Christen auff der Christen Armada seiten sein gewesen / Wie volgt.

Der Prinz von Vrbin, auff der General Galeen von So
phoien.

Der Prinz vō Parma, auff der Galeen Patrona vō Genua
Der Graff S. Fiore. General vber das Italianisch Kriegs
volck des König in Hispania etc. Auff einer Neapolitanischen
Gallea.

Der Herr Ascanius dela Cornia, Hauptman vber 3000.
Italianer / Florentinisch Kriegsvolck.

Der Herr Prospero Coluna, Colonell vber 5000. zu Sussen.

Der Herr Pompeius Coluna, Leutenampr / sampt andern
vnzelichen vortreflichen Herrn Haupt vnd Befelchsleuten /
ander Nation.

Es sein aber von den Christen vmbkommen auch
wie folgt / Der man in Eyl gemangelt.

Der Herr Augusti : Barbarigo, Proueditor. Herr Ihero : Contarini.
Benedict Sorantzio. Antonius Monegiani.

Ioan. Loredano. Iacobus Trefano.

Marcus Lando. Iacob : Bisanti von Cattaro.

Der Herr Marcus Contarini. Herr Sebastianus Contarini.

Catharinus Mali Pietro. Andreas Calergi aus Condia.

Franciscus Bonsfortzado. Antonius Dominici aus Cephalenia.

Andreas Bragadino. Vincen:ius Quirini.

Iacobus Dugieno. Ioan. Baprista Benedictus aus Cyperne

Antonius Palqualigo. Ludouicus Traun.

Iacobus de Mexo aus Candia. Iacobus Iustinianus von Malta.

Die Galea Capitana von Malta.

Ein

Ein Galea vom Babst vnd ein Galea von Sophoten sein vnuerseert bliben/ Aber alles Volck darauff vmbkommen/ vnd des Marci. Molinei. Vnd ein Galea von Saracossa. Vnd ein andere aus Sophoten hart beschediget worden.

So sein verwundet.

Marcus Cicogna. Mer ein Hauptman von Malta / vnd Marcus Molmeus, vnd vil anderer mer Nationen.

Aber von den vornembsten Türcken sein auch vmbkommen vnd gefangen / Die nachuolgenden.

Der Ali Bassa ist Todt / vnd sein zwen Sön/ einer von 15. vnd der ander von 17. Jarn gefangen worden.

Pattaw Bassa.

L: obi oder Obriste.

Von

Rodis.

Sijo.

Mettino.

Cauala.

Napoli di Romania.

Negroponte.

Megroponten.

S. Maura.

Der Caracossa Corsar.

Carechial.

Carachia.

Cara Peri.

Chiarabi.

Peruigasari.

Moral dores. Haupt

vnd Befelchsleute.

So nu der Allmechtig Gott/one zweifel/auff dz sehnlich vnd herblich anruffen/ so vil Tausent armer gefangener Christen/ disem gewaltigen Feindt widerstant gethan hat/ vnd in der eussersten not den anruffenden zu hilff komen ist / So sol auch menschlich hierob ein Exempel nemen / Alle seine zuuersicht vnd hoffnung auff den Herrn Christum zustellen/ vnd in gedult des

Herrn zuerwarten / welcher da wir zu sine von


herken ruffen werden/ aus allen nö-

ten vns erretten kan/

AMEN.

155691


(X 199 3567)



apost

simon





Anderer Warhafftige
Neue Zeitung / von
dem grossen Sieg der Christen / auff dem
Jonischen oder Ausonischen Meer / wider den Tür-
cken / so bey dem Porto Le Pante (sonsten
Naupactus genandt) aus sonderba-
rer schickung Gottes erhalten
worden / den 7. Octo-
bris / Im Jar
1571.

Sampt gewisser Verzeichnis / was auff
beiden seiten / von fürtrefflichen Leuten
gewesen / vnd zum theil ge-
fangen vnd blie-
ben sein.



Leipzig.

Gedruckt / durch Jacob Ber-
walds Erben.

